

文獻通考卷第一百八

鄱陽馬端臨貴與著

王禮考三

朝儀

神宗初卽位御史中丞王陶奏劾宰相韓琦不押常朝班陶坐黜知陳州

陶疏略曰忽千官瞻視之庭茂如房闥艱再拜表儀之禮重若邱山琦與曾公亮皆待罪故事朝廷以宰相日奏事垂拱退詣文德殿押常朝班或已過辰正緣中書聚廳見客有急速公事商量若必須輪宰臣

赴文德殿押班必於常朝事務太有妨滯故御史臺放班行之數十年非始於琦等陶以論事不行疑琦沮之故以此劾琦上不直陶黜之

熙寧元年詔自今授外任者許令轉訖朝辭二年監察御史裏行張戢程顥言每欲奏事必俟朝旨或朝政有闕及聞外事而機速後時則已無所及況往復待報必由中書萬一事干政府則或致沮格請依諫官例牒閤門求對或有急奏卽許越次登對庶幾遇事入告毋憂失時詔依所請

三年知制誥宋敏求等言文德殿入閤儀制考之國朝

會要與今儀制所載頗或異同按今文德殿唐宣政殿也紫宸殿唐紫宸殿也然祖宗朝皆嘗御文德殿入閣唐制常設仗衛於宣政殿或遇上坐紫宸卽喚仗入閣如此則當御紫宸殿入閣方協舊制請下兩制及太常禮院詳定詔學士院議翰林學士承旨王珪等言按入閣者乃唐隻日紫宸殿受常朝之儀也唐宣政殿卽今文德殿唐紫宸殿今紫宸殿也唐制天子坐朝必立仗於正衙若止御紫宸卽喚正衙仗自宣政殿東西閣門入故爲入閣五代以來遂廢正衙立仗之制今閣門所載入閣儀者止是唐常朝之儀非爲盛禮不可遵行從

之自是入閣之禮遂罷之敏求又言本朝以來惟入閣
乃御文德殿視朝今旣不用入閣儀卽文德殿遂闕視
朝之禮請下兩制及太常禮院約唐制御宣政殿裁定
朔望御殿儀以備正衙視朝之制詔學士院詳定儀注
學士韓維等以入閣圖增損裁定上儀曰朔日不值
假前五日閣門關諸司排辦前一日有司供帳於文
德殿其日左右金吾將軍常押本衙仗判殿中省官
押細仗先入殿庭東西對列文武官等分東西序立
諸軍將校分入北向立朝堂引贊官引彈奏御史二
員入殿門踏道當下殿北向立次催文武班分入並

東西相向對立諸軍將校卽於殿庭北向立班

其班次並

御史臺祇應

皇帝服靴袍垂拱殿坐鳴鞭內侍閣門管軍

依朔望常例起居次引樞密宣徽使三司使副樞密直學士內客省使以下至醫官待詔及修起居注官二員並大起居皇帝乘輦至文德殿後閣門奏班齊皇帝自後閣出殿上索扇升榻鳴鞭扇開簾捲儀鸞使焚香喝文武官就位四拜起居雞人唱時舍人於彈奏御史班前西向喝大起居御史由文武班後至對立位次引左右金吾將軍合班於宣制石南大起居班首出班躬奏軍國內外平安歸位再拜各歸東

西押仗位通喝舍人於宣制石南北向對立舍人退
於西階次揖宰臣親王以下躬奏文武百僚宰臣某
姓名以下起居分引宰臣以下橫行諸軍將校仍舊
立閤門使喝大起居舍人引宰臣至儀石北俛伏跪
致詞祝曰訖其詞曰文武百僚宰臣全銜臣某姓名
等言孟春之吉伏惟皇帝陛下膺受時
祉與天無窮臣等無
任歡呼忭蹈之至歸位五拜閤門使揖中書由東
階升殿樞密使帶平章事以上由西階升殿侍立並依

圖給事中一員

以知門下封
駁事官充

歸左省位立轉對立於

給事中之南

如罷轉對官每遇御史臺前期牒請文
官二員並依轉對官例先於閤門投進

奏狀吏部侍郎及刑法官立於轉對官之南兵部侍郎

於右省班南與吏部侍郎東西相向立定摺笏各出

班籍置笏上

吏部兵部侍郎以知審官東西院官充刑法官以知審刑大理寺官充

親

王使相以下分班出引轉對官於宣制石南宣徽使

殿上承旨宣荅如儀次吏部兵部侍郎及刑法官對

揖出

見謝辭班自從別儀

次彈奏御史無彈奏對揖出

如有彈奏並如

儀

引給事中至宣制石南揖躬奏殿中無事喝祇候

揖西出次引修起居注官次立排立供奉官以下各

合班於宣制石南躬喝祇候揖分班出喝文武官等

門外祇候出索扇垂簾皇帝降座鳴鞭舍人當殿承

旨放仗四色官轍鞞急趨至宣制石南稱奉勅放仗

金吾將軍并判殿中省官對拜訖隨仗出親王使相
節度使至刺史學士臺省官文武百僚諸軍將校等
並序班朝堂謝賜茶酒皇帝御垂拱殿座中書樞密
及請對官奏事不引見謝辭班後殿座臨時取旨其
日遇有德音制書御札仍候退御垂拱殿座制箱出
外應正衙見謝辭文武臣僚並依御史臺儀制喚班
依序分入於文武班後以北爲首分東西相向重行
異位依見謝辭班序位餘押班臣僚於班稍前押班
候刑法官對揖出分引近前揖躬舍人當殿宣班引
轉對班見謝辭並如紫宸殿儀樞密使不帶平章事

叅知政事至同簽書樞密院事宜徽使並立於宣制

石稍北宰臣親王樞密帶平章事使相繫押班者立

於儀石南

餘官並立於宣制石南並合贊喝閤門使

引並如儀贊喝訖係

中書樞密並揖升殿謝辭揖西出其合問聖體者並

如儀餘官分班出

彈奏御史候見謝辭班絕對揖出其朝見如謝都城門外御筵及詔

赴闕謝茶藥撫問之類不可合班者各依別班中謝對賜酒食等並門賜其係正衙見門謝辭亦門外喝

放應正衙見謝辭臣僚前一日於閤門投詣正衙榜

子閤門下奏目又投正衙狀於御史臺四方館應朔

日或得旨罷文德殿視朝止御紫宸殿起居其已上

奏目正衙見謝辭班並放免依官品隨赴紫宸殿引

或值改依常朝文德殿自有百官班日並如舊儀應
外國蕃客見辭候喚班先引赴殿庭東邊依本國職
次重行異位立候見謝辭班絕西向躬舍人當殿通
班轉於宣制石南北向立贊喝如儀西出其酒食分
物並門賜如有進奉候彈奏御史出入進奉入惟御馬及
擔床自殿西偏門入東偏門出其進奉出入文武官
起居舍人通某國進奉宣徽使喝進奉出節次如紫
宸殿候進奉出給事中奏殿中無事出其後殿再坐
儀式

合引出者從別儀其日賜茶酒宰臣樞密於閣子親
王於本廳使相宣徽使觀文殿大學士至寶文閣直
學士兩省官待制三司副使文武百官皇親使相以

下至率府副率及四廂都指揮使以下至副都頭並

於朝堂

如朝堂位次不足卽於朝堂門外序次

管軍節度使至四廂都

指揮使節度使兩使留後至刺史並於客省廳詔依

所定

合班圖載卷末

元豐元年詔右諫議大夫宋敏求權御史中丞蔡確樞密副使承旨張誠一直舍院同判太常寺李清臣詳定正旦御殿儀注敏求等遂上朝會儀二篇令式四十卷詔頒行

元正冬至大朝會儀注

前期有司設御座於大慶殿東西房於御座之左右少

北東西閤於殿後百官宗室客使次於朝堂之內外五
輅先陳於庭兵部設黃麾仗於殿之內外太樂令展宮
架之樂於橫街南鼓吹令分置十二案於宮架外協律
郎二人一位於殿上西階之前楹一位於宮架西北俱

東向陳輿輦御馬於龍墀繖扇於沙墀貢物於宮架之
南東西相向餘則列於大慶門之外

冬至不設貢物

扶持執事

侍立官及諸司使副立於左右樞密院諸房副承旨承
制以下立於殿下東西相向重行異位北上典儀設三
師三公侍中中書令左右僕射開府儀同三司位於丹
墀香案之南少東次尚書左丞位於其後皆面北西上

親王位於香案之南少西北面東上

上壽則知同知樞密院事位於親王

後之門下侍郎位於其東次左散騎常侍次給事中左諫

議大夫次左司諫正言皆重行位於其後觀文資政殿大學士學士端明殿學士位於次南並西南北上中書侍郎位於其西次右散騎常侍次中書舍人右諫議大夫次右司諫正言皆重行位於其後翰林學士承旨至寶文閣學士位於次南次樞密直學士以下次待制皆重行位於其後並東面北上起居郎舍人夾香案東西相向契丹使位於龍墀上少西北面東上宗姓節度使以下至率府副率位於橫街南分東西相對班各重行

異位北上左右巡使位於次南東西相向宮架前少東則特進以下至未升朝官班各重行異位北面西上夏國使在宮架之東軍員位於其後夏國人從次之宮架前少西則御史臺班節度以下又位於西並重行北面東上皆視特進退一列外高麗國使在宮架之西軍員位於其後高麗人從次之諸蕃客位於次西陪位進奏官位於宮架之南諸道貢舉解首位於其後皆北面而設敘班位於大慶門外東西相對以北爲上中書侍郎諸方鎮表案於右給事中祥瑞案於左

冬至不設給事中位祥瑞案下

同其日闕大慶門列黃麾仗張旗幟羣官宗室使各服

其服以俟太樂令帥樂工入太常卿立於宮架前協律
郎就舉麾位中書侍郎以諸方鎮表給事中以祥瑞案
令令史對舉侍衛官各就列輦出至西閣降輦符寶郎
奉寶俱詣閣奉迎有司引祕書監以下次御史知雜以
下次宗姓及外任防禦使以下就位侍中版奏中嚴復
位少頃奏外辦閣簾捲殿上鳴蹕太樂令令撞黃鐘之
鐘右五鐘皆應內侍承旨索扇扇合皇帝服通天冠絳
紗袍御輿出西閣協律郎俛伏舉麾興奏乾安之樂鼓
吹振作皇帝出自西房降輿卽御座南向扇開殿下鳴
蹕協律郎偃麾戛鼓樂止鑪烟升符寶郎奉寶置御座

前尚書左右丞以上門下中書省官及待制以上至大學士正議大夫以上御史中丞以上宗姓及外正任觀察使以上契丹使班分東西各以次入奏正安之樂就位樂止中書侍郎押表案入詣西階下東向立給事中押祥瑞案入詣東階下西向立押樂官歸本班起居畢復案位三師以下至尚書左右丞親王以下至百官及御史臺官外正任契丹使俱就北向位贊者曰拜在位者皆再拜舞蹈三稱萬歲再拜訖又再拜太尉將升中書令門下侍郎俱降至兩階下立

冬至門下侍郎不奏下同

太尉詣

西階下行則樂作至位樂止升階中書令門下侍郎各